

敕修陝西通志

第九
函
十冊

陝西通志第八十五卷

藝文一

御製 詔誥

羲畫蒼書開天載道綺麗餘波筆精墨妙買賦長門金馬待詔昆
明紙飛玉尺衡較被之管絃清平新調砭愚訂頑翼經垂敷郁郁
彬彬南山隱豹衷諸大雅視爲典要作藝文志第三十一

祭告西嶽華山文

順治八年四月初七日

惟神穹窿豫鎮聳峙蓮峯萬品賴成群生仰盛朕誕膺

天命祇荷神休特遣耑官用伸殷薦惟神鑒焉

祭告西鎮吳山文

順治八年四月初七日

惟神毓秀五峯建維三輔瞻岐帶渭育物福民朕誕膺

天命祇荷神休特遣耑官用伸殷薦惟神鑒焉

祭告橋陵文

順治八年四月初七日

自古帝王受

天明命繼道統而新治統聖賢代起先後一揆功德載籍炳若日星明

禋大典亟宜肇隆敬遣耑官代將牲帛神其鑒享

祭周文王陵文

順治八年四月初七日

自古帝王受

天明命繼道統而新治統聖賢代起先後一揆功德載籍炳如日星朕

誕膺

天眷紹續丕基景慕前徽圖追芳躅明禋大典亟宜肇隆敬遣耑官代

將牲帛爰修殷薦之誠用展儀型之志伏惟格歆尚其鑒享

祭吳山文

康熙六年八月

惟神毓秀五峯建維西隴瞻岐帶渭育物福民朕躬親政務祗蒞神

庠特遣專官用申殷薦惟神鑒焉

祭漢文帝陵文

康熙七年五月。凡在陝諸陵祭文俱同。

自古歷代帝王繼

天立極功德並隆治統道統昭垂奕世朕受

天眷命紹續丕基庶政方新前徽是景明禋大典亟宜肇修敬遣耑官

代將牲帛爰昭殷薦之忱聿備欽崇之禮伏惟格歆尚其鑒享

祭告吳山文

康熙二十一年三月

惟神凝位金天建維隴首屏翰西土配嶽稱尊朕祗承神祐疆域蕩平特遣耑官用申殷薦惟神鑒焉

祭漢文帝陵文

康熙二十一年四月。在陝諸陵祭文同。

自古帝王受

天顯命繼道統而新治統聖賢代起先後一揆成功盛德炳如日星朕

誕膺

眷祐臨制萬方掃滅兇殘廓清區宇告功古后殷禮肇稱敬遣專官代
將牲帛爰修禋祀之誠用展景行之志仰企明靈尚其鑒享

祭告吳山文

康熙二十七年十二月

惟神秀峙五峯雄標三輔襟汧帶隴配岳西陲朕續承祖宗丕基虔
恭明祀茲以

皇祖妣孝莊仁宣誠憲恭懿翊天啟聖文皇后神主升祔
太廟禮成特遣耑官用申秩祭惟神鑒焉

祭告橋陵文

康熙二十七年十二月○
周文武及漢唐諸陵文同

自古帝王受

天明命御曆膺圖時代雖殊而繼治同道後先一揆朕承
奉佑臨制萬方稽古禮文肅修祀事茲以

皇祖妣孝莊仁宣誠憲恭懿翊天啓聖文皇后神主升祔

太廟禮成特遣專官代將牲帛虔修禋祀之典用抒景行之忱仰

冀明靈鑒茲誠悃

祭漢文帝陵文

康熙三十五年正月
在陝諸陵文同

自古帝王繼

天出治道法兼隆莫不慈惠嘉師覃恩遐邇朕勤恤民依永期殷阜邇
年以來郡縣水旱間告年穀歉登蚤夜孜孜深切軫念用是專官秩
祀爲民祈福冀靈爽之默贊溥樂利於羣生尚鑒精忱俯垂歆格

祭告吳山文

康熙三十
六年八月

惟神秀峙五峯位尊二隴名稱喬嶽地鎮金天朕以勦除狡寇三履
遐荒期掃邊塵乂安中外今者祗承神祐塞北永清用告成功端官
秩祀惟神鑒焉

陝西通志 卷八十五
祭告漢文帝陵文

康熙三十六年八月
在陝諸陵文同

自古帝王受

天景命制治綏猷必禁暴除殘以乂安黎庶緬懷往烈道實同符朕欽承

帝祉臨御九圍茲以狡寇跳梁親征漠北蕩滌寇氛廓清邊徼永消兵革以與普天率土樂育太和敬遣專官代將牲帛昭告古先哲后虔修禋祀式彰安攘之模用展景行之志仰企明靈俯垂鑒饗

祭吳山文

康熙四十二年四月

惟神位奠金天功齊華嶽威靈丕赫作鎮西方朕祗承休命統馭寰區夙夜勤勞殫思上理歷茲四十餘載今者適屆五旬海宇昇平民生樂業見輿情之愛戴沛下土之恩膏特遣專官虔申秩祀尚憑靈貺益錫蕃禧祐我國家共登仁壽神其鑒焉

祭橋陵文

康熙四十二年五月。周文武漢唐諸陵文俱同。

自古帝王繼

天立極出震承乾莫不道洽寰區仁週遐邇朕欽承丕緒撫馭兆民思致時雍常殷惕勵歷茲四十餘載今歲適屆五旬宵旰兢兢無敢暇逸漸致民生康阜世運昇平頃因黃淮告成親行巡歷再授方畧善後是期觀民志之歡欣滋朕心之軫恤邁回鑾馭大沛恩膏用遣專官敬修祀典冀默贊邇隆之治益弘仁壽之休尚鑒精忱俯垂昭格

西巡祭告周文王陵文

康熙四十二年十一月。在陝諸陵文同。

朕勤求上理撫育群生巡行雖歷東南咨訪未經西土茲因觀風閱武察吏安民不憚冰霜泣止秦省稽前代之陵寢皆密邇於長安惟帝德在生民功存當代芳型昭著令譽長垂披覽簡編恒深緬想遣專官而展祭列俎豆以將誠靈其鑑知來歆來格

平定朔漠告成太學碑

康熙四十三年三月二十一日

維

天盡所覆海內外日月所出入之區悉以鼻予一人自踐阼迄今蚤夜殫思休養生息冀臻熙皞以克副維皇大德好生之意庶幾疆域無事得以偃兵息民迺厄魯特噶爾丹阻險北陲因此一方人既荼毒塞外輒狡焉肆其凶逆犯我邊鄙虐我臣服人用弗寧夫蕩寇所以息民攘外所以安內邊寇不除則吾民不安此神人所共憤天討所必加豈憚一人之勞弗貽天下之逸於是斷自朕心躬臨朔漠欲使悔而寧心故每許以不殺彼怙終不悛我師三出絕塞朕皆親御以行深入不毛屢涉寒暑勞苦艱難與偏裨士卒共之迨彼狂授首脅從歸誠荒外君長來享闕下西北萬里灌燧銷烽中外乂謐惟朕不得已用兵以安民既告厥成事迺蠲釋眚災潔事禋望爲億兆祈

乎之福而廷臣請紀功太學垂示來茲朕勞心於邦本嘗欲以文德
化成天下顧茲武略廷臣僉謂所以建威消萌宜昭斯績於有永也
朕不獲辭攷之禮王制有曰天子將出征受成於學出征執有罪反
釋奠於學以訊馘告而泮宮之詩亦曰矯矯虎臣在泮獻馘又禮王
師大獻則奏愷樂大司樂掌其事則是古者文事武事爲一折衝之
用具在樽俎之間故受成獻馘一歸於學此文武之盛制也朕嚮意
於三代故斯舉也出則告於神祇歸而遣祀闕里茲允廷臣之請猶
禮先師以告克之遺意而於六經之指爲相符合也爰取思樂泮水
之義爲詩以銘之以見取亂侮亡之師在朕有不得已而用之之實
或者不戾於古帝王伐罪安民之意云爾銘曰巍巍先聖萬世之師
敬信愛人治平所基煌煌聖言文武道一禮樂征伐自天子出朕臨
域中逾茲三紀嘗見羨牆寤寐未失下念民瘼上承帝謂四海無外

盡隸侯尉維彼兇醜瀆亂典常旣梗聲教遂窺我疆譬之於農患在
螟螣秉畀不施將害稼穡度彼游魂險遠是怙震以德威可往而取
朕志先定龜筮其依屬車萬乘建以龍旂祝融駭驚風伯戒途宜暘
而暘利我樵蘇大野水涸川瀆効靈泉忽自涌其甘如醴設爲犄角
一出其西一出其東中自將之絕域無人獸群受掩五日窮追彼狂
走險大殲於路波血其孥翦其黨孽俘彼卒徒衆烏晝號單馬宵遁
恐久駐師重爲民困慎固戍守還轅於京自夏徂冬雨雪其零載馳
載驅我行止在蠢茲窮寇昏惑不悔我邊我氓以休以助爰寧其居
爰復其賦藩落老稚斯恬斯嬉歲晏來歸春與之期春風飄翩揚我
旆旂我今于邁如涉我郊言秣我馬狼居胥山登高以眺閔彼彈丸
天降兇罰孤雛就羈三駕三捷封狼輿尸旣腊梟獍旣獮豺豕大漠
西北解甲棄殳振旅凱入澤霈郊小明禋肆赦用迓景福昔我往矣

在泮泗陳師鞠旅誓屈群醜今我來思在泮獻功有赫頌聲文軌
來同採芹採藻頌興東魯車攻馬同亦鐫石鼓師在安民非出得已
古人有作昭示此旨緬維虞廷誕敷文德聖如先師戰慎必克惟兵
宜戢惟德乃綏億萬斯年視此銘詞

重修西嶽廟碑文

康熙四十
四年六月

天地定位山嶽效靈體發育之能贊生成之德尊踰四瀆秩視三公
祀典之於五嶽禮綦重矣矧華山峻峙雍州雄踞西土辨方維西兆
歲事於有秋盛德在金助氣機之始肅興兩則膏流河渭出雲而氣
接恒嵩尤宇宙之奧區神祇之靈府也嶽廟當華陰衢道基址崇宏
棟梁巍煥明裡彤蜚降格居歆國家之邀福迓禧以大庇我陝東西
數千里之蒼黔者於是乎在而年歲浸久則傾圯湯漉不能無虞朕
於癸未冬省方西巡莅止少華之麓矚雲臺望仙掌靈蹤勝蹟髣髴

於烟嵐翠靄間而西連隴坂東接函關土俗民風停車坐悉秋露凝而勤收穫商飈起而謹蓋藏年穀屢豐閭閻日阜自非神庥曷克臻此於是入祠展謁遣祭致虔特命所司鳩工載葺不興一役輪奐丕新葺收之別館增輝少昊之下都彌綸自今以始達精忱於玉帛陳黍稷之馨香默祐潛孚嘉祥翕集佐坤靈以作成萬物弘允澤而利濟群方豈有量哉爰勒豐碑用垂奕禩

廣仁寺碑

康熙四十四年十一月初一日

朕存心天下睠顧西陲惟茲關隴之區實切封疆之重歲當癸未特舉時巡省方設教訓吏寧人已責除租行慶布德引年賜帛獎學興賢所過山川聖哲祠域遣修祀事用殫精禋凡所以裨邦政厚民生者靡弗致勤焉又以運際承平無忘武備簡稽將士整飭戎行發內帑之金錢普軍中之頒給爰於演武之垣躬親校閱之典以建威

萌之義有觀德習禮之風顧念久安長治務在因俗宜民若乾竺之傳言雖殊尚而利濟之道指有同歸閱武之頃周覽地形相其爽塏命創招提卽大資之餘貲爲雙林之小築厥工匪侈逾載告竣斯役也經營適協乎輿情銖黍不煩夫民力將使黃山巖岫秀比靈山渭水波濤凝如定水洪河浪息渡法海之津梁華嶽雲開通耆闍之轍跡五陵六郡之衆迴向香城外蕃屬國而遙群遊淨土賁神光之常護上以祝

慈壽於無涯助王化之遐宣下以錫民庥於有永其亦朕綏懷寰宇順導烝黎之至意也歟於是題廣仁之額標括三乘書多寶之碑昭垂奕葉云爾

祭告吳山文

康熙五十二年五月

惟神秀秉金天功齊華嶽靈威有赫作鎮西方朕纘受鴻圖撫臨區

宇殫思上理夙夜勤求惟日孜孜不遑暇逸茲御極五十餘年適當
六旬初屆所幸四方寧謐百姓乂和稼穡歲登風雨時若維庶徵之
協應爰群祀之虔修特遣耑官式循舊典冀益贊雍熙之運尚永貽
仁壽之休俯鑒精誠用垂歆格

祭漢文帝陵文

康熙五十二年六月
在陝諸陵文同

自古帝王繼

天出治建極綏猷莫不澤被生民仁周寰宇朕躬膺寶曆仰紹前徽夙
夜孜孜不遑暇逸茲御極五十餘年適當六旬初屆所幸四方寧謐
百姓乂和稼穡歲登風雨時若維庶徵之協應爰群祀之虔修特遣
耑官式循舊典冀益贊雍熙之運尚永貽仁壽之休俯鑒精誠用垂
歆格

祭告吳山文

康熙五十八年三月

維神三輔稱雄五峯競秀儲精少昊作鎮奧區朕纘承祖宗丕基虔恭明祀茲以

皇妣孝惠仁憲端懿純德順天翼聖章皇后神主升祔

太廟禮成特遣專員用申秩祭惟神鑒焉

祭漢文帝陵文

康熙五十八年三月
在陝諸陵文同

自古帝王受

天景命建極綏猷垂萬世之經常備一朝之典禮朕欽承

帝祉臨御九圍夙夜惟寅敬將祀典茲以

皇妣孝惠仁憲端懿純德順天翼聖章皇后神主升祔

太廟禮成特遣專官代將牲帛用展苾芬之敬聿昭禋祀之虔仰冀明

靈尚其歆享

祭告吳山文

雍正元年二月

惟神秀秉金天功齊華嶽靈威有赫作鎮西方朕纘受丕基新承景命竊念

皇考膺圖以來百靈效順四海從風坐享昇平六十餘載茲當嗣位之始宜隆祀享之儀特遣專官虔申昭告惟冀時和歲稔物阜民安淳風徧洽乎寰區厚德長敷於率土尚其歆格鑒此精誠

祭漢文帝陵文

雍正元年二月○
在陝諸陵祭文同

自古帝王繼

天出治建極綏猷莫不澤被生民仁周海宇惟我

皇考峻德鴻勲媲美前古顯謨承烈垂裕後昆朕以渺躬纘膺大寶當茲嗣位之始宜修享祀之儀特遣專官虔申昭告惟冀時和歲稔物阜民安淳風徧洽乎寰區厚德常敷於率土尚其歆格鑒此精誠

祭橋陵文

雍正二年正月○周文
武成康漢唐陵俱同